



Minister Lee ta anuncia e prome ruta cultural


Monumentonan rond Oranjestad ta worde usa strategicamente




Futuro Plaza Cultural.



Casita geel.



Cas Henriquez.



Forno di Calki.

ORANJESTAD (AAN):
Diahuebs ultimo durante un

conferencia di prensa Minister Lee tabatin e honor pa introduci na prensa e prome Ruta Cultural. Alavez el a anuncia cu lo pasa un programa informativo na TeleAruba di e vision pa rutan cultural como parti di un maneho integral entre Ministernan di Turismo, Infraestructura y Cultura. E programa a inicia diadomingo ultimo y lo ser ripiti den curso

di simannan benidero.

UN PASEO RIBA E RUTA: Ta cuminsa na Plaza Cultural unda sinta canto di awa ta wak e barconan ta drief y unda ta bebe un chuculati di pinda prome cu bay compra artesanía for di nos artistanan local como un recuerdo unico y educativo. Canando rond riba e plaza, unda lo tin musica crioyo ta zona den background, por admira e plachinan dunando reconocimiento na nos baluartenan.

For di e plaza cultural un empleado, bon na altura di tur aspecto cultural, ta dirigi un

tour pa e casita geel (ex-Aruba Bank) banda di e parada di Arubus como un segundo parada riba e ruta cultural di monumentonan. Unabes einan, e empleado ta duna un splicacion hopi detaya di e monumento, pasobra el a worde certifica pa expertonan pa por duna e tour aki. Den e edificio mes tin mas educacion di nos cultura cu parti di museo y infomacion pa bishitantenan y ta mira tur loke aruba tin pa ofrece.

Mercado popular, situa tras di e Casita Geel y e parada di bus, lo probecia di e fluho di

hende cu e ruta lo trece y ta situa centralmente pa ofrece un parti di e experiencia multicultural di Aruba. Mercado popular lo complementa e Plaza Cultural y ta e conexion entre e monumentonan di Casita Geel cu e Caya historico cultural (schelpstraat).

E ambiente caribense y colorido di e mercado popular ta un atraccion riba su mes y ta un bon descanso pa bishitantenan entre exhibicionnan educativo na e monumentonan y unda por compra diferente souvenirnan.

For di Mercado Popular, e siguiente parada riba e ruta cultural di monumentonan ta Cas Ecury y Henriques na Schelpstraat, den loke lo bira Caya Historico Cultural. Na Cas Ecury, unda un Museo Archeologico cu facilidad renoba y completamente ekipa, ta duna un bista di nos historia archeologico cu un exposicion moderno, atractivo y di hopi balor educacional, prome cu pasa pa cas Henriquez unda atrobe nos cultura ta worde exhibi.

E ruta ta sigui pa varios otro monumentonan historico cultural, manera Plaza Alameda y Edificio di Corte, Watertoren, Caya Grandi, Wilhelmmina Straat y Cas Eloy Arends (stadhuis), pasa na nos Forti Willem III Toren unda Museo Cultural Historico ta entrene bishitantenan pa un rato placentero y educativo prome cu nan termina nan ruta atrobe na Plaza Cultural.

Otro rutan den futuro: Ya caba ta trahando pa desaroya varios otro rutan cultural. Usando e chempel di ADIA cu su foyeto di un caminata di arquitectura kier integra esaki pa un of mas ruta arquitectonico. Otro rutan por ta: ruta fotografico, ruta di compras, ruta culinario, ruta di entretenimiento (musica, baile y teatro), ruta di Galerianan di Arte Plastico, ruta di hardinnan, etc.

Desaroyo di e rutan ta conta riba atraccionnan existente pero mas importante ainda, e interes y ideanan di ciudadanonan y gruponan di nos comunidad. Trahando hunto riba un maneho integral ta e mihor manera pa mehora tanto e nivel economico como cultural di Aruba.